

欽定剿平粵匪方略

欽定勦平粵匪方略卷二十五 癸丑年

正月二十日乙丑向榮奏言臣於正月初三日收

復武昌省城卽督兵跟勦於初四日晚追至葛店地方趕上賊船開礮擊沈二隻並拋擲火彈立燒近岸賊船三隻其餘船均順流下竄當令各營挑選奮勇兵壯共得二千四百餘名不帶鍋帳臣親率總兵和春秦定三李瑞玉山及革

員福興等管帶晝夜疾追欲抄往九江截賊東
下之路途聞撫臣張芾由九江移至瑞昌縣防
堵臣卽於初八日戌刻趕至瑞昌已繞過逆匪
之前因會晤撫臣張芾云下游巢湖紮有蘇皖
及江西官兵二千三百餘名北岸老鼠峽亦紮
有官兵一千六百餘名陸建瀛帶兵二千餘名
並師船紮離下巢湖三十里之龍坪地方堵截

可以遏其下竄等語臣訪查下巢湖一帶防禦
實未得法深慮賊至貽誤事機必得親往布置
與陸建瀛會商酌辦卽於初九日五鼓帶同兵
勇繞道往下巢湖至午刻約離十餘里卽據報
探賊船已過下巢湖該處防守官兵均經潰散
大礮火具盡已資敵督臣陸建瀛亦折回九江
現在賊船旣已駛過下巢湖離九江僅百里順

流直下瞬息可到情形十分危急臣復折回瑞昌卽派總兵和春等帶隊星夜趕往連日大雨軍士冒雨前進備極艱苦旋聞賊船已至盧家集一帶離九江僅三十里城內百姓搬徙一空防城器具一無所備祇大礮火藥極多無兵防守督臣陸建瀛已由九江折回下游一帶不知泊於何處聲息不通情形至此萬分焦灼急欲

趕救九江城池催兵直至官牌峽地方詎料賊船亦於十一日早先到十餘隻駛至九江河岸經各鎮將迎前轟擊打壞賊船七隻該逆不能抵禦駛往北岸灣泊時大隊賊船千餘連檣而至兵勇開礮轟擊該逆一面拒敵一面分十餘處攔岸灣泊約五六千人紛紛擁撲前來臣指揮官兵分路極力衝殺從辰至午斃賊不少兵

勇亦有陣亡受傷該逆又將近城小河浮橋砍斷以阻我兵進路現在賊至九江我兵須渡過北岸始可直達安慶若仍從大江南岸追躡既恐繞道太遠又小河極多並有鄱陽湖之隔該逆壓江而下尤爲迅捷我兵步行疲於奔命勢難趕上若能多覓船隻順流追擊庶可得手臣昨已札飭興國州趕辦船隻又飛咨張芾趕緊

雇覓星夜放下以備追勦惟我兵到此無路繞
往賊前如提臣陳金綬統帶北兵能趕到安徽
一帶則安慶始可無虞至閩省官兵三千名聞
其走散九百數十名之多殊屬有干軍令節經
臣飛咨江西湖南福建各省督撫提臣轉飭經
過各文武一體按名嚴拏重辦以儆效尤惟該
管帶兵將備漫無覺察實屬咎有應得且派令

防守武昌打仗亦不得力所有帶兵官參將周兆麟等均請

旨先行革職以肅軍令至總兵郭仁布統率無方咎亦難辭惟打仗尙無退避情事請

旨交部議處至防守下巢湖官兵如何潰散亦咨督臣陸建瀛查明嚴行叅辦臣現將官兵暫紮拖船溝一帶離九江二十餘里一面催趨未到官兵

趕緊前來一面查探賊蹤相機籌辦奏入

上命軍機大臣傳諭向榮曰逆匪連檣東竄該大臣挑選官兵晝夜兼程冒雨前進繞出賊前行走尙爲迅速所稱軍士艱苦情形著該大臣隨時查察傳旨獎勵以作士氣逆匪已至九江我兵無路可繞賊前該大臣札飭興國州趕辦船隻又飛咨張芾趕緊雇覓現在是否敷用不致誤事旨德布等所帶礮船會否

駛到著向榮分別催集於安徽江甯大江兩岸無分
水陸趕緊追剿勿令賊匪占踞江口截我南北之路
陳金綬統帶北兵已屢次催令趕赴安徽並令琦善
帶兵從後接應此時如已馳抵安徽一帶該大臣卽
當隨時知照兩路併力夾攻向榮與陳金綬素悉兵
機必能和衷共濟行軍緩急應變惟在臨時酌度旣
不可畏蕙失機亦不可輕率貽誤至福建官兵旣無

裨益著卽遣撤以節糜費其防守下巢湖官兵如何潰散北岸老鼠峽官兵如何堵截情形一併確查具奏

上諭內閣曰逆匪竄出武昌順流東下經向榮分路衝殺斃賊多名現在賊勢已近九江我兵先後趕到行走尙爲迅速著向榮督率鎮將等無分水陸相機追剿陳金綬此時諒已統帶北兵趕赴安徽與向榮合

力夾擊並著陸建瀛張芾蔣文慶等於大江兩岸沿途節節扼要堵截毋得稍有疏虞至福建官兵中途走散竟至數百名之多帶兵將備不能約束咎已難辭且派令防守武昌打仗亦不得力所有署泉州參將周兆麟漳州遊擊顧得欽都司陳光標遊擊陳金鑾汀州遊擊高士濬均著先行革職仍飭將逃兵嚴拏重辦以肅軍令總兵郭仁布統率無方著革職留

任以示懲儆

同日張亮基奏言粵逆竄踞武陽橫江搭造浮橋往來策應浮橋不斷誠恐此攻彼竄終難得手臣前接准向榮移咨卽已飛飭盧應翔將所帶礮船駕駛前往總兵音德布參將韋中魁前經奏調管帶滇兵來楚卽在常德設防嗣因澧州兵單經臣等札飭韋中魁移紮澧州羅繞典

復將韋中魁帶赴襄陽並札調音德布移紮澧
州臣接奉

諭旨後飛咨音德布卽於澧州雇船帶兵前進參將韓
世禧於上年十月賊解圍西竄時卽日跟蹤追
賊並未留在長沙現歸何人統帶容俟查明飛
催前進長沙現在防兵率皆疲乏難期得力臣
前奏擬募勇訓練較之客兵稍爲可恃意俟練

勇漸集卽將疲兵盡撤歸伍今奉

諭旨再挑數百名湊成千名可否俟臣馳抵岳州再爲
籌畫鄧紹良聞現駐城陵磯臣已飛飭於岳州
一帶多雇船隻並招募水摸二三百名豫備柴
草硝磺等物同盧應翔船隻迅速駛往奏入

上命軍機大臣傳諭張亮基曰逆匪已至九江東下官
兵隨後追剿需船甚急所有盧應翔礮船及音德布

韋中魁韓世禧鄧紹良各員既據分別飛催著卽將何日起程何日到營計程若干有無遲逾之處一一查明分晰詳奏尙榮孤軍前進軍糧最關緊要張亮基署理湖廣總督責無旁貸務須及早籌備源源接濟所稱挑兵一節並著迅卽調集催進勿致誤事武昌黃州被賊搶去軍餉若干著卽詳細查奏

二十一日

丙寅

蔣文慶奏言臣於正月十六日申

刻接據探報九江賊匪全行東下已到小孤山
伏思臣自上年八月奏辦防堵至今調兵未齊
率皆遷延觀望以致坐誤事機此時臣雖激勵
將士官員等奮勇登陴嬰城固守無如垣薄兵
單何以當此兇燄伏乞

皇上嚴飭琦善兼程前來應援並求

諭令向榮即日帶領精兵兼程赴皖援救至直隸提臣

陳金綬經臣疊次迎催頃據探報由羅山光州固始到安徽潁州一帶繞道湖北黃州沿江直上尙無起身確期臣已馳函商囑徑由霍邱取道六安直到皖省仍求

嚴飭限日馳赴以資協助奏入

上命軍機大臣傳諭琦善陳金綬陸應穀曰前因賊匪勢將東竄屢次諭令陳金綬迅赴安徽並諭琦善前

爲接應本日據蔣文慶馳奏賊匪已到小孤山省垣
危在呼吸疊次迎催陳金綬尙無起身確期覽奏實
深焦灼賊艘連檣而下昨據向榮馳報督帶精兵趕
抵九江惜無船隻北渡不能直抵安慶現已趕緊覓
辦由水路追擊如陳金綬統帶北兵能迅速趕到安
慶始可無虞陳金綬諒已起程若仍繞路湖北更恐
緩不濟急著卽徑由霍邱縣取道六安州不分星夜

兼程直赴安慶以救危急並與向榮聯絡聲勢隨時
知會城內官兵前後夾擊堵其東竄之路琦善仍遵
前旨星速前進徑赴皖省與向榮相爲犄角同心協
力保全下游大局萬不可再有遲誤陸應穀此時曾
否折回南陽賊匪全股東下豫境防兵除酌留扼守
外其餘均當直赴皖省接應現在吉林黑龍江馬隊
陸續前往此項勁旅應由何路趕赴皖境著琦善陳

金綬酌度迎催毋任迂道致延時日軍營糧餉並著
陸應毅派員經理源源接濟無稍貽誤

二十二日丁卯蔣文慶奏言皖省地處沿江城垣

單薄各路援兵至今未到城中居民業已遷徙
一空而糧餉軍裝所關匪細萬一盡爲賊有更
助兇燄臣接周天爵來函以皖城萬無守理迅
催臣飭令兩司攜帶餉銀退保廬州囑臣帶兵

馳赴正陽一帶既可策護糧餉復可爲金陵後路援應臣亦未敢拘泥致誤事機遂速將糧餉軍裝分水陸兩路押赴廬州臣仍督同藩司統帶官兵在省奮力剿賊

同日呂賢基奏言臣昨閱邸鈔知陸建瀛因鎮將失事退守江甯毫無布置查江防須扼重上游小孤山爲江皖第一門戶至皖省以下如貴

池之攔江磯羅刹磯銅陵之鵲頭磯繁昌之三
山磯板子磯蕪湖之磁磯蠓兒墩等處次第相
接形勢險要均可分設水砦安置礮臺其下則
當塗之東梁山和州之西梁山兩山相距僅三
里許矗立水際對峙如門江流至此一束所謂
天門山者尤爲天然關鍵又南岸迤東三十里
有采石磯峭拔陡峻最爲中流要隘守金陵者

必先制勝於此至總督兼轄水師固應多調戰艦以備防勦儻一時未能調集惟木筏最爲適用查南京城外龍江關上河下河等處木筏雲集其上可以築牆安礮攔截江心不爲風浪所撼尤足以抵禦賊船而沿江柴船頗多亦足備火攻之用應請

飭令陸建瀛於江面險要處所迅速布置至陸路賊匪

偏近宿松若由宿松驛路取道江北則由太湖
桐城舒城合肥下巢湖達江僅五百餘里江北
以廬州府爲最要廬州以巢湖爲最要蓋廬郡
爲七省都會江皖水陸皆恃此爲屏蔽且其地
多匪棍毗連鳳穎黨與聲息互通必須重臣駐
紮此地既可扼賊北竄又可彈壓土匪又查巢
湖在廬州府東五十里跨合舒廬巢四縣向來

江北用兵多於此練習水師聞近年常有盜船
出沒其中若令地方紳士購綫招募懸賞錄用
遇賊順江東下卽令其駛出江口與梁山鎮水
師合力邀截必可獨當一面現在皖省大員防
守喫緊未能兼顧惟周天爵曾任廬州知府民
情素所洞悉應請

旨速飭周天爵蒞紮廬州相機籌辦以爲江皖應援均

奏八

上命軍機大臣傳諭蔣文慶周天爵曰現在各路援兵
未能到齊蔣文慶將省城糧餉軍裝押赴廬州該撫
仍當與藩司等在省極力防守毋稍疏虞一切布置
機宜蔣文慶既與周天爵意見相同著卽會同籌辦
向榮諒已尾追東下省城現有防兵或周天爵所募
練勇能與向榮併力夾攻亦可以挫該逆揚帆直下

之勢至巢湖爲陸路要隘急宜防守鳳穎一帶土匪
衆多尤宜設法彈壓招徠勿致爲賊所誘呂賢基到
皖尙需時日先著該撫等熟商妥辦該逆慣用地雷
所有挖濠鑿聽等法爲守城要務必須豫爲籌備

上又命軍機大臣傳諭陸建瀛楊殿邦楊文定曰現在
皖城告警金陵一水直下勢亦危急陸建瀛自九江
折回沿途作何布置呂賢基所稱各處磯墩節節險

要原可設立水砦安置礮臺惟賊鋒已偏既恐措置不及且沿江兩岸袤延數百里零星分設兵單勢弱亦恐無裨守禦祇可就扼要處所迅速設防仍須以重兵紮護礮臺或省城外江岸屯兵互爲犄角現在大江南北惟向榮一軍可資應援該督撫等務與聲勢聯絡以期彼此策應遏賊登陸之路又豫防地雷空濠窺聽之法著陸建瀛等妥籌辦理仍一面星速

派兵援救安慶一面會同祥厚楊文定督飭鄒鳴鶴
祁宿藻等將省城防守事宜籌畫周密毋致臨時失
措其瓜州京口一帶仍責成楊殿邦督同地方官妥
爲防範

上又命軍機大臣傳諭向榮曰現在向榮統帶官兵駐
拖船溝一帶所雇船隻是否可濟急用其盧應翔及
音德布管帶礮船是否業經趕到不勝懸繫蔣文慶

已將省城糧餉軍裝移赴廬州該撫與藩司在省防守若賊至皖省空城無可據掠連檣直下則江甯尤當其衝勢甚危急向榮惟當察看情形何處緊急卽須迅往應援仍隨時知照陸建瀛楊文定蔣文慶等合力夾攻以勦爲守陳金綬如已到皖著卽會同籌辦無論水陸及江口要隘相機堵截勿令賊匪占踞截我南北之路

上諭內閣曰工部左侍郎呂賢基著卽馳驛前往安徽會同蔣文慶周天爵辦理防剿事宜安徽定遠縣知縣現署壽州知州金光飭卽交蔣文慶周天爵等差遣委用

上又諭內閣曰前任漕運總督周天爵著賞加兵部侍郎銜會同蔣文慶呂賢基辦理防剿事宜

同日大學士軍機大臣刑部會奏言臣等伏查

賽尙阿身爲統帥調度乖方以致勞師糜餉日
久無功實屬罪無可逭賽尙阿合依守邊將帥
平時守備不設爲賊所掩襲因而失陷城寨者
斬監候律擬斬監候秋後處決奏入

上諭內閣曰已革大學士賽尙阿經朕簡派欽差大臣
辦理廣西軍務未能迅速剿賊致令蔓延楚省勞師
糜餉深負朕恩賽尙阿著卽照裕誠等所擬按律定

爲斬監候秋後處決並著將伊子鑾儀衛冠軍使崇
緒禮部主事崇熙工部主事崇綺吏部員外郎崇絢
一併革職

二十三日 戊辰 江南提督福珠洪阿奏言臣奉

旨帶兵前赴江甯扼要布置查江南提標五營以及沿
江沿海蘇福狼三鎮各營業經先後調防兵丁
七千餘名松江近接蘇省又與上海脣齒相依

現屆海運亦須官兵護送地方巡防在在均關
緊要是以臣於五營內先行派帶兵丁二百名
卽於本月初七日起程雨夜趨行十二日馳抵
江甯省城將軍祥厚等已將城內城外設嚴空
濠各事一律布置臣連日親往查看實屬周妥
復查城外雨花臺最爲扼要臣卽帶領官兵駐
紮該處與副都統霍隆武升授徐州鎮總兵程

三光協力巡防以戰爲守復調提標兵一百名
福左營兵二百名狼右營兵三百名秦州營兵
一百名飭令迅速來省均由臣帶領防守奏入
上諭曰汝等旣爲兵丁統率必須示以鎮靜不可驚惶
庶可同心奮勇以少勝多

同日向榮奏言臣前次追賊至九江打仗我兵
因繞道折往下巢湖致該逆得以先期駛到九

江隨查探該逆於十一日將船灣泊城外因百姓早經遠避空城無所擄掠祇將廟宇衙署稅廠焚燒卽於十二十三兩日陸續開船下行並據逃出民人聲稱武昌被脅百姓沿途逃散者不少故該逆所過地方多未攏岸臣現將官兵暫紮九江城外惟逆船順流下行我兵陸路奔馳勢難趕上且到江南陸路須從九江渡河由

北岸追勦始可直達安慶臣前札飭興國州趕辦船隻能否辦得尙無信息臣於到九江時卽派遊擊朱占鼈駛往大姑塘一帶雇覓船隻提臣蘇布通阿等統帶川兵駐紮金口臣已咨調前來並囑於上游順便覓船帶下以便渡江惟兵勇旣無餉銀又無糧米連日風雪交作實有凍餒之虞臣現已飛咨撫臣張芾迅提銀十萬

兩解赴大營並多張告示招商復業派弁赴各村莊採買米糧以資接濟至郎中盧應翔礮船前接徐廣縉復函於長沙解圍時已經撤退其上游雇覓船礮亦久未見到臣現已飛催副將鄧紹良星夜帶兵東下總兵音德布所帶滇兵千餘名現已調來差遣惟逆匪自擄得多船水陸往來無阻我兵祇能於陸路追勦難從水面

攔擊故非水師礮船不能攔江截剿 臣現飛咨
兩廣督 臣葉名琛速調外海水師戰船並快蟹
大爬等項湊足百隻多配子藥選員統帶由海
道駛至江南迎頭堵擊至賊船阻風尙在湖口
縣一帶灣泊離九江僅二三十里 臣一俟催到
餉銀解到船隻卽催兵趕緊渡江跟蹤追剿

同日祥厚楊文定福珠洪阿霍隆武奏言鎮江

瓜州爲南北咽喉重地臣楊殿邦奉

諭駐紮江口辦理防禦若待其到後調兵恐致遲誤臣

楊文定隨於徐州河標吳淞蘇鎮太湖等營酌
調兵丁五百名師船入隻駛赴鎮江一帶豫備
漕臣調遣並飛飭上海道雇募廣艇鎮江府雇
募水摸赴甯備用至於勸捐助餉早已分飭各
府竭力籌辦現又先將句容丹陽兩縣漕糧全

數截留分運江甯鎮江兩處備用其餘各府分
別酌留所慮兵力無多援剿諸臣尙無確信相
應請

旨速飭琦善向榮陳金綬剋日繞出賊前跟蹤追剿不
得再事濡滯

楊文定又奏言督臣陸建瀛業已回省據稱已
將蕪湖防兵撤歸東西梁山臣思蕪湖爲江蘇

全省水陸要隘該處荻港板子磯等處亦經督
臣奏明設防今倉猝撤回恐上游不免震驚而
東西梁山亦難布置周妥均奏入

上命軍機大臣傳諭向榮曰逆船順流下行我兵陸路
奔馳勢有難及現在安徽省城遷徙一空糧餉移至
廬州我軍船隻儘不應手亦難飛渡琦善陳金綬已
於本月十九日自信陽馳往安徽而陸建瀛蒼黃折

回江甯城大兵單亟望援兵相助向榮著卽督帶大
兵由陸路馳抵江甯與祥厚陸建瀛楊文定等會籌
守禦其江口上下並與文藝楊殿邦等扼險設防毋
令占踞要口致遏南北之路如上游所謂船礮趕到
卽可水陸夾擊與琦善陳金綬聲勢聯絡互爲犄角
至九江以下所過江安兩省州縣如有漕糧及庫存
銀兩倉儲穀石均著該大臣提用以濟急需

上又命軍機大臣傳諭陸建瀛祥厚楊殿邦楊文定曰
陸建瀛自九江折回尙望其沿江布置省城恃以無
憂乃將蕪湖荻港板子磯等處防兵全行撤歸東西
梁山豈皖境安危與該大臣無涉而江省上游險要
惟梁山可以扼守餘皆不必設防耶所有江省防守
機宜經楊文定與該將軍等設法妥籌仍著陸建瀛
一面接應安徽一面與該將軍等和衷商榷旣將防

兵全行撤歸梁山卽當竭力扼守毋令賊船闖入至
向榮大軍由陸路進行裹糧已竭若不卽爲接濟恐
誤軍需著該大臣等迅飭沿途各屬府州縣無論截
留漕米及常平義倉穀石速爲碾動所撥軍需銀兩
亦應通融濟用運赴向榮大營毋稍貽誤其揚子江
口經楊文定先後調集兵丁師船此時楊殿邦想已
趕到一切派撥鎮守均著該漕督速籌妥辦至蕪湖

由東壩可達蘇常今蕪湖業已撤防應飭江蘇藩司
聯英等就近設備以固藩籬著一併妥籌辦理

上又命軍機大臣傳諭葉名琛柏貴曰現在賊匪東竄
江防萬分喫緊已命向榮馳赴江甯迎頭截擊著葉
名琛柏貴卽將該省外海水師戰船並快蟹大爬
項湊足百隻多備子藥遴委水師勇幹鎮將大員統
帶星速由海道駛抵江甯聽候該大臣撥用毋稍遲

誤

同日舒興阿奏言臣於正月十一日馳抵西安
省城與舒倫保張祥河面爲商酌現在賊勢猖
獗陝西興商一帶及潼關均應駐兵防守而三
路之中尤以商州爲最要臣先經函商張祥河
前後調派固原等處官兵二千七百餘員名派
委署宜君營參將薩炳阿統帶前往商州會同

延榆綏道段大章在武關一帶擇要防堵又酌
調漢中陝安官兵一千九百餘員名派委副將
恆興統帶會同鳳邠道文海陝安道周鳴鑾前
往接壤湖北之關垵子白河一帶防堵並責令
陝安鎮總兵郝光甲於所屬毗連楚境口隘一
體飭屬嚴防又派固原兵四百五十名前往潼
關交護潼關協副將寇文耀會同潼商道朱慶

祺與協屬官兵一律分布查三路官兵目前尙可駐守惟慮逆匪紛紛奔突不得不厚集兵力以杜竄越臣現復續調河州鎮屬官兵五百名飭令星馳前來與臣現帶官兵二百餘員名酌撥商州興安扼要處所以期周密臣於本月十六日起程先赴商州查看情形妥爲籌辦後再赴興安一帶相機調度奏入

上命軍機大臣傳諭舒興阿曰該督前後調到防堵官兵統計五千八百餘名現在賊竄下游陝境情形與去歲不同前調防兵如有堪撥下游助剿者必須移緩就急該督卽一面奏聞一面調遣知照向榮陳金綬等率同攻剿不可以有用之兵置之無用之地其本境扼要處所仍著嚴密防守

同日都統銜琦善直隸提督陳金綬奏言臣等

於正月初八日移出信陽城外依山紮營現在
已到之兵僅止直隸督標五百名提標一千八
百名正定鎮標一千名天津通永二鎮標各五
百名陝西固原提標五百名其餘尙滯中途臣
陳金綬卽將直隸提標暨天津正定通永各鎮
兵共三千八百名於十九日管帶起程馳赴安
徽一帶截勦現據候補四品京堂勝保聲稱情

願同往此外尙有現到之兵一千名臣琦善亦
卽於是日先行管帶起程徑赴湖北江西一帶
沿途截擊其餘各兵均令隨後追趨現該匪已
棄陸登舟誠當以火攻爲要臣琦善已飛咨台
湧暨羅繞典張亮基豫備寬大堅實之襄陽大
編船千餘隻或五六百隻並於水手外添雇水
摸多人派弁押赴下游相機備用奏入

上諭內閣曰現在賊匪已偏皖省情形緊急陳金綬著
卽迅赴安慶等處琦善所帶之兵亦應徑赴安徽爲
陳金綬後路接應若由湖北江西繞路轉恐緩不濟
急該大臣等自豫起程已屬遲延必須兼程馳赴賊
匪所在地方儘力追截毋得再涉紆緩致誤事機昨
已有旨令勝保同陳金綬帶兵前進茲據奏該員於
未奉諭旨之先自請同往尙屬奮勉可嘉琦善等起

程後糧餉一切著陸應穀派委幹員源源接濟河南
防堵事宜仍著該撫督同藩司鄭敦謹妥爲籌辦毋
稍疏懈

二十四日己巳祥厚霍隆武奏言九江上游情形

緊急江甯城大兵單臣等現將精壯閒散挑選
九百餘名以資遣用並商同楊文定鄒鳴鶴督
率布政使祁宿藻及八旗協領等將城上一律

安設礮位二百七十餘門督飭官兵嚴密稽查
防守伏思九江安徽上游情形如此江甯地當
下游一水直達省城重地亟應添兵固守查城
內綠營兵丁除調赴他處防堵外僅贍兵數百
名撫臣楊文定所調兵五百名目下僅有徐州
兵一百名奇兵營礮兵五十餘名到省提臣福
珠洪阿雖已抵省祇帶兵二百名續調兵七百

名到省尙需時日旗營僅有兵三千餘名城垣周圍九十六里實屬不敷分撥惟有叩懇

天恩迅飭向榮琦善統帶兩處重兵速由捷徑繞出賊前直抵江甯省城協力堵截以資捍衛奏入

上諭曰已有旨令向榮趕赴金陵今閱汝等所奏情形城上多設礮位固因防守起見若兵少不能護礮適足資寇而助逆燄也

同日張亮基奏言臣由長沙前赴武昌於正月十三日祇領關防任事武漢兩城新復亟應豫籌控制之策兼招集流亡嚴拏土匪以爲安民殄寇之計臣現飭南省總局裝米五千石制錢五千緡由水路運赴北省並出示安撫難民招徠商賈但兩城得自灰燼之餘武昌尤省會重地當此力圖整理實與從新創造無殊需用孔

繁無可設措頃准署湖北巡撫臣駱秉章來咨
奏懇

飭部籌撥現銀三十萬兩迅速解鄂臣思部款起解需
時緩不濟急惟有仰懇

天恩飭下附近之河南陝西四川等省無論何款先行
借給三十萬兩委員迅速解赴湖北省城一俟
部撥有款再行撥還該省庶轉運迅捷籌辦得

以應手奏入

上命軍機大臣傳諭張亮基曰武昌漢陽兩城現經收復所有招集流亡嚴查土匪在在均關緊要駱秉章已由岳州馳赴武昌張亮基亦經接受總督關防並於湖南總局裝米五千石制錢五千緡由水路運赴北省著卽兼程解往安撫招徠與駱秉章熟商籌辦至所稱需用孔繁無可設措亦屬實在情形現在該

省漕糧業經展緩該署督或於豐收地方勸令富紳
大賈量捐銀米或於各該州縣內酌量碾動倉穀以
爲賑恤難民撫綏一切之用至向榮大營現在待餉
甚急該署督官仍遵前旨趕緊籌解源源接濟斷不
准將各省解餉藉口截留致有貽誤

張亮基又奏言陝西候補知府江忠源前丁憂
在籍時經前大學士臣賽尙阿奏調馳赴廣西

軍營追賊入楚又經前督臣徐廣縉奏留管帶
楚勇副賊竄出湖南因該員所募之勇原議捍
衛桑梓不遣出境經臣檄委勦辦巴陵晏仲武
瀏陽徵儀堂各股土匪均已竣事該員現已服
闋應卽給咨赴部惟湖北省城甫經收復撫綏
防勦在在需才該員志在匡時才能應變臣深
知其人差委足資得力可否准臣帶赴湖北差

遣委用奏入

上從之

同日張芾奏言臣於正月初十日在瑞昌督兵堵禦至十一日賊船全數下竄臣卽開道趕回郡城邀擊行至中途知九江府城已於十一日失守督臣陸建瀛退在下游堵截臣萬分焦灼伏思賊情叵測是否祇在潯江滋擾卽行東下

抑或分竄入湖窺伺南昌以圖牽掣均難懸揣
惟省城重地兵力尙單現在民心不免驚惶陳
孚恩屢次來函囑臣趕回籌辦守禦臣一面函
致向榮催兵追剿並札飭駐紮姑塘之臬司譚
光宸等一俟賊退卽速入郡安撫居民復飭知
府林福祥會同各將官收集兵丁以備遣用臣
督兵進剿旣不得力又不能兼顧郡城以致倉

猝失守實難辭咎相應請

旨將臣從重治罪奏入

上諭內閣曰張芾奏本月初十日賊船下竄該撫在瑞昌督兵堵禦十一日趕回九江行至中途探聞府城失守昨據向榮奏報九江城內居民先已遷徙一空是賊匪乘虛竄入旋即退出不知該處文武所謂嬰城固守者安在張芾雖在瑞昌防堵督率不力咎實

難辭著革職留任帶罪自效現在賊竄下游該撫卽
株守空城亦屬無益著卽回省與陳孚恩等於沿江
一帶密爲防範查拏土匪鎮定人心並委幹員接濟
向榮大營軍餉其九江城內卽飭令臬司惲光宸等
招集流亡妥爲安撫該地方文武員弁或被難殉節
或先期逃避著一併確查據實具奏

同日

上命軍機大臣傳諭楊殿邦日前諭楊殿邦等於鎮江瓜州等處江口派兵防守計已迅速前往扼紮籌辦刻下賊船已過九江下游江防尤關緊要因思回空漕船現已渡黃南下且有一千三百餘隻之多江甯安徽兩處漕糧亦有旨准其截留此次運船是否可以作爲堵截江口之用各幫水手可否飭令幫同防堵俱著楊殿邦悉心體察妥爲布置總期相機防剿

毋令賊匪占踞鎮江瓜州二口是爲至要